

ԱԲԳԱՐ ՅՈՎՀԱՆՆԻՍԵԱՆ. ՊԱՏՄԱԲԱՆԻ ԴԻՄԱՆԿԱՐԸ
(ԾՆՆԴԵԱՆ 100-ամեակի ԱՌԻԹՈՎ)

Վարուժան Պողոսեան

Խորհրդային պատմաբանների ներդրման նշանակությունը Ֆրանսիայի պատմութեան ուսումնասիրութեան ասպարէզում գերազանահատելու հարկն ամենեւին չկայ: Խորհրդային պատմագրութիւնն ի սկզբանէ դրսեւորել է անթաքոյց հետաքրքրութիւն, մասնաւորապէս՝ Ֆրանսիայի նոր դարի պատմութեան նկատմամբ՝ եւ իր անգնահատելի աւանդը ներդրել XVIII-XIX դարերի ֆրանսիական յեղափոխութիւնների, սոցիալ-տնտեսական յարաբերութիւնների զարգացման եւ հասարակական մտքի պատմութեան առանցքային հիմնախնդիրների քննական վերլուծութեան բնագաւառներում: Այն առաջադրել է մեծ թուով աշխարհահռչակ պատմաբանների փայլուն մի աստղաբոյլ, որի ներդրումը Ֆրանսիայի պատմութեան ուսումնասիրութեան ասպարէզում բարձր գնահատականի է արժանացել միջազգային պատմագիտական շրջանակներում:

Ակադեմիկոսներ Նիկոլայ Լուկինը (1885-1940) եւ Վեաչեսլաւ Վոլգինը (1879-1962) 1920-ական թուականներից ի վեր ձեռնամուխ են եղել խորհրդային պատմաբանների առաջին սերնդի կրթութեանը՝ դառնալով մարքսիստական պատմագիտական դպրոցի հիմնադիրները, որի ներկայացուցիչներից շատերը հետագայում դարձան ռուսական դպրոցի գործի ջահակիրը եւ նուաճեցին պատմագիտական Օլիմպոսի բարձունքները: 1960-70-ական թուականներին միջազգային լայն ճանաչման էին արժանացել Ֆրանսիայի պատմութեան ուսումնասիրութեան ասպարէզում մեծ աւանդը ներդրած այնպիսի հեղինակաւոր պատմաբան-

ներ, ինչպիսիք են՝ Ալբերտ Մանֆրեդը, Բորիս Պորչնեւը, Վիկտոր Դալինը, Ֆեոդոր Պոտեոմկինը, որոնցից շատերի հիմնարար աշխատութիւնները պարբերաբար թարգմանուել են տարբեր լեզուների՝ ապահովելով նրանց համար պատուաւոր տեղ համաշխարհային պատմագիտութեան ասպարէզում: Նրանց թուում էր նաեւ ակադեմիկոս Վոլգինի սան, ականաւոր պատմաբան Աբգար Յովհաննիսեանը:

Խորհրդային եւ հայրենական պատմագիտական միջօրէականներում խոր հետք թողած ակադեմիկոս Աբգար Ռուբէնի Յովհաննիսեանի (1908-1991) անունը քաջ յայտնի է մեր հանրապետութեան շրջանակներից դուրս: Նա ծնուել է 1908 թ. մայիսի 30-ին Թիֆլիսում՝ իրաւաբանի ընտանիքում: Նրա պապը՝ Աբգար Յարութիւնի Յովհաննիսեանը (1849-1904), եղել է անուանի հրասլարակախօս, լրագրող եւ հասարակական գործիչ, գլխաւորել ազգային-պահպանողական հոսանքը XIX դ. վերջին քառորդում, 1876-1881 թթ. եւ 1882-1898 թթ. խմբագրել համապատասխանաբար՝ Փորձ եւ Արձագանգ պարբերականները¹:

Գիտական մկրտութիւնը ստանալով 1920-30-ական թուականներին՝ Ա. Յովհաննիսեանն աւելի քան կէս դար խորհրդային պատմագրութեան անդաստանը հարստացրել է ոչ միայն XVIII-XIX դարերի ֆրանսիական հասարակական մտքի,

1 Այդ մասին տե՛ս Մ. Հ. Մխիթարեան, XIX դարի երկրորդ կէսի արեւելահայ պարբերական մամուլի պատմութիւնից («Փորձ», «Արձագանգ»), Եր., 1976:

այլեւ XVIII դարում հայ ժողովրդի ազատագրական շարժումների պատմութեան առանցքային հիմնահարցերին նուիրուած մեծարժէք գիտական աշխատութիւններով, որոնք նրա անունը փառքով են պսակել խորհրդային եւ համաշխարհային պատմագրութեան երկնակամարում: Չափազանցրած չենք լինի, եթէ հաւաստենք, որ հայ ժողովրդի նոր դարի պատմութեան ուսումնասիրութեան ասպարէզում նա ոչ միայն Լէօի, ակադեմիկոսներ Աշոտ Յովհաննիսեանի եւ Մկրտիչ Ներսիսեանի հետ մէկտեղ XX դարի հայրենական պատմագրութեան չորս գագաթներից էր, այլեւ միաժամանակ խորհրդային պատմագրութեան սիւներից:

XVIII-XIX դարերի ֆրանսիական ուստպիական կոմունիզմի եւ սոցիալիզմի պատմութեանը նուիրուած Ա. Յովհաննիսեանի ուսումնասիրութիւնները բարձր են գնահատել թէ՛ խորհրդային եւ թէ՛ արտասահմանեան պատմաբանները, որոնք պարբերաբար դրանք արժեւորել են պատմագիտական տարբեր հեղինակաւոր պարբերականներում տպագրուած զրախօսութիւններում եւ ֆրանսիական հասարակական մտքի պատմութեան ուսումնասիրութեան վերլուծութեանը նուիրուած աշխատութիւններում²: Պատմաբանի լաւա-

գոյն՝ «Կոմունիստական գաղափարները Ֆրանսիական մեծ լեղափոխութեան տարիներին» մենագրութիւնը³ 1974 թ. արժանացել է նրա ուսուցչի՝ ակադեմիկոս Վոլգինի անունան՝ ԽՍՀՄ ԳԱ սահմանուած մրցանակի: Երկար տարիներ Ա. Յովհաննիսեանը միջազգային գիտաժողովներում ներկայացրել է խորհրդային պատմագիտութիւնը, նաեւ գլխաւորել խորհրդային պատմաբանների պատուիրակութիւնները: Այս յետնախորքի վրայ առաւել եւս, նպատակայարմար ենք գտնում ստորեւ ուշադրութիւնը կենտրոնացնել սոսկ նրա՝ իբրեւ պատմաբանի դիմագծի վրայ:

Ա. Յովհաննիսեանի ուսումնառութիւնը եւ գիտական դաստիարակութիւնը համընկել են ԽՍՀՄ-ում մարքսիստական պատմական գիտութեան ձեւաւորման բարդ ժամանակաշրջանին: Պատմագիտական մտքի զարգացման այս նոր փուլը, որը թեւակոխում էին նորաստեղծ խորհրդային պետութեան պատմաբանները, նրանց առաջադրում էր միանգամայն նոր պահանջներ: Մենք հակուած չենք հաւաստելու, թէ 1920-30-ական թուականներին մարքսիստական պատմական գիտութեան կայացումը յանգեցրել է միանշանակօրէն դրական արդիւնքների: Խորհրդային պատմագիտական մարքսիստական դպրոցի ինքնահաստատման գործընթացը ոչ միայն ճանապարհ է հարթել խիստ կարեւոր կտրուածքով սոցիալ-տնտեսական յարաբերութիւնների յենքի վրայ պատմական անցեալի խոր ուսումնասիրութեան համար, այլեւ միաժամանակ մեծապէս խոչընդոտել է պատմագիտական մտքի անկաշկանդ զարգացմանը, քանզի դրա՝ մարքսիստական մեթոդոլոգիայի միահե-

2 В. А. Дунаевский, Б. Ф. Поршнев, Изучение западноевропейского утопического социализма в советской историографии (1917-1963). "История социалистических учений. Памяти академика В. П. Волгина", М., 1964, ст. 34, 42-44, 55-56, 59; В. А. Дунаевский, Г. С. Кучеренко, Западно-европейский утопический социализм в работах советских историков, М., 1981, ст. 49-50, 58-61, 73-74, 77-78, 122-127; В. М. Далин, Историка Франции XIX-XX веков, М., 1981, ст. 159-160, 280. Նշենք, որ Ա. Յովհաննիսեանի արխիւում պահպանուել են ակադեմիկոսներ Ե. Տարլէի, Վ. Վոլգինի, Ն. Դրոմիցինի, պրոֆեսորներ Ա. Մանֆրեդի, Վ. Դալինի եւ այլոց խիստ դրական, սո ալսօր չֆրասպարակուած կարծիքները նրա տարբեր գրքերի կամ գրքերի ձեռագրերի մասին. տե՛ս ՀՀ Ազգային արխիւ, ֆ. 1169 (Ա. Ռ.

Յովհաննիսեանի), ց. 1, գ. 250, թ. 9-9 շՈՂ., 28. գ. 261, թ. 1-8. գ. 265, թ. 1-5. գ. 266, թ. 1-4:
3 А. Р. Иоаннисян, Коммунистические идеи в годы Великой французской революции, М., 1966; А. Ioannissian, Les idées communistes pendant la Révolution française, Moscou, 1984.

ծան տիրապետութեան հաստատման գերնպատակ հետապնդող առաջընթացն ուղեկցուել է անհարկի քաղաքականացումը ծայրայեղութիւններով: Այս պայմաններում մարքսիստ պատմաբանների առաջին սերնդի ներկայացուցիչները ոչ միայն նսեմացնում էին պատմագիտական ոչ մարքսիստական ուղղութիւնների դերն ու նշանակութիւնը, այլեւ երիտասարդական աւելնով, յանրաւի, անողոք պայքար էին մղում մարքսիզմն, իբրեւ մարդկային հասարակութեան պատմութեան մեկնաբանութեան միակ հնարաւոր մեթոդոլոգիայ, անվերապահօրէն չընդունող թէ՛ ռուսական պատմագրութեան կարկառուն ներկայացուցիչների (Նիկոլայ Կարէեւ, Եւգենի Տարլէ եւ այլք) եւ թէ՛ ֆրանսիացի հեղինակաւոր պատմաբանների (մասնաւորապէս՝ Ալբեր Մատյեզի) դէմ՝ չխորշելով անգամ նրանց վրայ բարդելուց ոչնչով չհիմնաւորուած քաղաքական մեղադրանքներ⁴:

Այսպիսով, անջրպետելով խորհրդային պատմական գիտութիւնը համաշխարհային պատմագիտական դաշտում տեղի ունեցող բոլոր շահեկան տեղաշարժերից եւ XX դարում պատմագիտական ոչ մարքսիստական մտքի աննախադէպ առաջընթացից, ինչն, անտարակոյս, մեթոդոլոգիական նոր մօտեցման առաւելութիւնների շարքում չի կարելի դասել՝ մարքսիստական խորհրդային գիտութիւնը գեոեւս իր խոյացման արշալոյսին նախանշել է այն հիմնական ոլորտները, որոնց վրայ հարկ էր դրուել խորհրդային պատմաբանների ուղղորդութիւնը: Դրանք յանգում էին սոցիալ-տնտեսական յարաբերութիւնների զարգացման, հասարակութեան,

4 St'u G. Zaydel, M. Dvibak, *Классовый враг на историческом фронте*, М.-Л., 1931; *Полемика Альбера Матъеза с советскими историками. 1930-1931 гг.* Предисловие В. А. Дунаевского, "Новая и новейшая история", 1995, N 4, ст. 199-211.

գլխաւորապէս՝ ձախ ուժերի գործունէութեան կտրուածքով քաղաքական պատմութեան եւ նրանց գաղափարախօսութեան ուսումնասիրութեանը, ինչը պայմանաւորուած էր մարքսիզմի հիմնական առանցքային հայեցակարգային դրոյթներից մէկով՝ դասակարգային պայքարի տեսութեամբ, ըստ որի՝ պատմութեան շարժիչ ուժը ժողովրդական զանգուածներն են:

Պատմաբանն, անտարակոյս, իր ժամանակի ներկայացուցիչն է: Ա. Յովհաննիսեանը չէր կարող բացառութիւն կազմել: Նրա գիտական գործունէութեանը բնորոշ են նոր ծնունդ առած մարքսիստական խորհրդային գիտութեան առանձնաշատութիւններից շատերը: Նախ՝ ինչպէս եւ իր սերնդակիցները, 1920-ական թուականներին, իբրեւ գիտական ուսումնասիրութիւնների հիմնական ոլորտ, նա ընտրել է խորհրդային պատմաբանի համար հնարաւոր՝ նշուած ուղղութիւններից մէկը, այն է՝ ֆրանսիական ուսուցիչական կոմունիզմի պատմութիւնը, որի նկատմամբ նրա հետաքրքրութիւնը. ըստ իր իսկ հաւաստման, ծագել է գեոեւս ուսանողական տարիներին, երբ այսօր արդէն՝ շէ Ազգային գրադարանում պահուող Ղորղանեանի անձնական ֆոնդում ծանօթացել է XVIII դարի ֆրանսիացի ուսուցիչ կոմունիստների երկերին:

1930-ական թուականներին Ա. Յովհաննիսեանի մոտաքր պատմական գիտութեան ասպարէզ նշանաւորող առաջին գիտական աշխատութիւնները, որոնք դարձել են նրա ատենախօսութիւնների (համապատասխանաբար՝ 1935 թ. ԽՍՀՄ ԳԱ-ում եւ 1938 թ. Մոսկուայի պետական համալսարանում պաշտպանուած) յենքը, նուիրուած են եղել XVIII-XIX դարերի ֆրանսիացի նշանաւոր ուսուցիչ կոմունիստներ Ռետիֆ դը Լա Բրետոնի եւ Շառլ Ֆուրիէ հայեցքների ուսումնասիրութեանը⁵:

թեանը⁵: Դրանք հիմնուած էին բացառապէս տպագիր սկզբնաղբերների մանրակրկիտ ուսումնասիրութեան վրայ, ինչը միանգամայն համահունչ էր նոր ձեւաւորուող խորհրդային պատմական գիտութեան զարգացման ընդհանուր համայնապատկերին:

1920-40-ական թուականներին խորհրդային երիտասարդ պատմաբանները, խիստ ոգեւորուած բացառապէս մարքսիստական մեթոդոլոգիայի հիման վրայ պատմութեան մեկնաբանութեան անհրաժեշտութեամբ, որը, նրանց համոզմամբ, ապահովում էր իրենց անառարկելի գերազանցութիւնն արեւմտեան պատմագիտական ուղղութիւնների ներկայացուցիչների նկատմամբ, յաւուր պատշաճի ուղղորդութիւն չէին դարձնում արխիւային փաստաթղթերի թւումնասիրութեան վրայ: Նոյնիսկ այն սակաւաթիւ պատմաբանները, որոնց 1920-ական թուականներին հնարաւորութիւն էր ընձեռուել գիտական գործողունների մեկնելու արտասահմանեան երկրներ, սահմանափակուած էին, այդուհանդերձ, գլխաւորապէս տպագիր սկզբնաղբերների ուսումնասիրութեամբ⁶: Ակնյայտ է, որ խօսքը տուեալ պարագայում վերաբերում է պատմագիտութեան ասպարէզ մուտք գործած մի ամբողջ սերնդի կողմէն հոգեբանութեանը:

Ամէն դէպքում, գիտական բարձր մակարդակ ունեցող առաջին իսկ աշխատութիւնների շնորհիւ Ա. Յովհաննիսեանը կարճ ժամանակամիջոցում իրաւամբ ձեռք է բերել հասուն եւ կայացած պատմաբանի

համբաւ⁷: Այդ մասին է վկայում 1941 թ. ԽՍՀՄ ԳԱ Պատմութեան ինստիտուտի նոր եւ նորագոյն պատմութեան բաժնի ղեկավարներից Ֆ. Պոտեոմկինի՝ նրան ԽՍՀՄ ԳԱ համակարգում մշտական աշխատանքի հրաւիրելուն առնչուող առաջարկութիւնը, որը միտուած էր ինստիտուտի աշխատանքների մակարդակի բարձրացմանը⁸:

Փոխարէնը, 1940-50-ական թուականներին Ա. Յովհաննիսեանի՝ XVIII դ. հայ ժողովրդի ազատագրական շարժումների պատմութեանը նուիրուած գրքերը խարսխուած էին խորհրդային արխիւներում պահուող վաւերագրերի մանրակրկիտ ուսումնասիրութեան վրայ⁹: Ըստ էութեան, չունենալով նախորդներ, նա առաջինն է յաւուր պատշաճի արժեւորել Յովսէփ Էմինի գործունէութիւնը¹⁰ եւ Ռուսաստանի՝ 1780-ական թուականներին

7 Երեւանի համալսարանի ղեկավարութեանը յղած 1931 թ. փետրուարի 10-ի թուակիր ամսական ակադեմիկոս Վոլգինը գրել է. «Ընկ. Աբգար Յովհաննիսեանն իմ ղեկավարութեամբ աշխատանքներ է իրականացնում XVIII դ. ֆրանսիական սոցիալիզմի ուսումնասիրութեան ասպարէզում: Գտնում եմ, որ այդ աշխատանքն ունի մեծ նշանակութիւն գիտական կոմունիզմի մատչելիքներին յայտնաբերելու եւ, հետեւաբար, սոցիալիստական գաղափարների զարգացման ընդհանուր հայեցակարգի մշակման համար: Այդ խնդրի իրականացման համար ընկ. Յովհաննիսեանը տիրապետում է բաւականաչափ գիտելիքների եւ ունի գիտաշխատողի արտասովոր ընդունակութիւններ»: Տե՛ս շէ Ազգային արխիւ, ֆ. 1169, ց. 1, գ. 251, թ. 1:

8 А. В. Ревякин, Федор Васильевич Потемкин // *Портреты историков. Время и судьбы*, том 2. Всеобщая история, М., 2000, ст. 398.

9 А. Р. Иоаннисян, Иосиф Эмин, Ер., 1945; Գոյնի՝ *Россия и армянское освободительное движение в 80-х годах XVIII столетия*, Ер., 1947; Գոյնի՝ *Присоединение Закавказья к России и международные отношения в начале XIX века*, Ер., 1958.

10 Գիրքը բարձր գնահատականի է արժանացել թէ՛ խորհրդային պատմաբանների կողմից եւ թէ՛ արտերկրում: Տե՛ս Բ. Заходер, "Вопросы истории", 1946, N 11-12, ст. 155-157; Գ. Գիւլաշեան, *Հայրենիք*, 1949, թիւ 5, էջ 103-106:

5 Տե՛ս, օրինակ, А. Р. Иоаннисян, Ретиф-де-ла Бретон, "Ретиф-де-ла Бретон, Южное открытие, произведенное летающим человеком, или французский Дедал", М.-Л., 1936, ст. V-LVIII; Գոյնի՝ *Генезис общественного идеала Фурье*, М.-Л., 1939; Գոյնի՝ *Шарль Фурье*, Ер., 1941:

6 Տե՛ս, օրինակ, В. М. Далин, *Из истории социальной мысли во Франции*, М., 1984, ст. 6-8:

հայկական ազատագրական շարժման նկատմամբ ունեցած դիրքորոշումը: Նշենք, որ Ա. Յովհաննիսեանի արխիվում նրա՝ Ռուսաստանը եւ հայկական ազատագրական շարժումը XVIII դարի 80-ական թուականներին մենագրութեան մասին պահպանուել է ակադեմիկոս Տարլէի յիշարժան գնահատականը: Այս գրքի առնչութեամբ նրան յղած հակիրճ նամակում Ե. Տարլէն գրել է. «Հէնց նոր ստացայ Ռուսաստանը եւ հայկական ազատագրական շարժումը XVIII դարի 80-ական թուականներին ձեր աշխատանքը: Արդէն հպանցիկ իսկ ծանօթութիւնը թողնում է շատ հետաքրքիր եւ պատկառելի հետազոտութեան տպաւորութիւն: Կը կարգամ այն անյապաղ. ես պէտք է շուտով մի գլուխ պատրաստեմ Վ. Զուբովի արշաւանքների եւ նրա նախորդ գործողութիւնների մասին»¹¹:

Ուստի միանգամայն օրինաչափ է, որ, հաշուի առնելով դեռեւս երիտասարդ պատմաբանի արժանիքները, ԽՍՀՄ ԳԱ փոխնախագահ ակադեմիկոս Վոլգինը 1947 թ. ՀՍՍՀ ԳԱ ակադեմիայի հերթական ընտրութիւնների կապակցութեամբ առաջադրել է նրա թեկնածութիւնն ակադեմիկոսի տեղի համար յայտարարուած մրցոյթին¹², որի արդիւնքում նա ընտրուել է ակադեմիայի անդամ:

Այդուհանդերձ, հարկ ենք համարում նշել, որ հայկական ազատագրական շարժումների պատմութեանը նուիրուած նրա գրքերը ստալինեան վարչակարգի մայրամուտին բոլորի կողմից չեն արժանացել միանշանակօրէն դրական գնահատականների: Այդ մասին է վկայում Ա. Յովհաննիսեանի գրաւոր ելոյթներից մէկը: Մեզ անյայտ հանգամանքների բերումով, 1950 թ. նա գիտական մամուլում հարկադրա-

բար հանդէս է եկել ինքնաքննադատական յօդուածով եւ հրատարակու «ընդունել» իր հասցէին բարդուած տարբեր, իրականում ոչնչով չհիմնաւորուած քաղաքական «մեղադրանքներ»¹³ ընդգծելով, մասնաւորապէս բուրժուական պատմագրութեան ազդեցութիւնն իր վրայ, որի նկատմամբ ինքն, իբր Ռուսաստանը եւ հայկական ազատագրական շարժումը XVIII դարի 80-ական թուականներին գրքում քննադատական մօտեցում չի ցուցաբերել: Ելնելով Ա. Յովհաննիսեանի յօդուածից՝ կարելի է անտարակուսելի համարել, որ նրան մեղադրել են, մասնաւորապէս աղբբեջանական ժողովրդի պայքարը՝ թուրքական եւ պարսկական կեղեքիչների դէմ հայ եւ վրացի ժողովուրդների պայքարի ընդհանուր համատեքստում չընդգրկելու մէջ:

Մեր օրերի բարձունքից կարող է սոսկ զարմանք յարուցել նրա կողմից իրեն յանրաւի վերագրուող մեղադրանքների ընդունման փաստը: Սակայն հարկ է հաշուի առնել, որ հակառակ պարագայում ստալինեան վարչակարգի ճիրաններում գտնուող պատմաբանը կարող էր արժանանալ կեանքի հետագայ տարիները քաղաքական բանտարկեալների համար նախատեսուած ստալինեան ճամբարներում անցկացնելու՝ իր գործընկերներից շատերի (Աշոտ Յովհաննիսեան, Վ. Դալին, Եակով Զախեր եւ այլք) դժխեմ ճակատագրին:

Չնայած այս հանգամանքին, հաշուի առնելով հայկական ազատագրական շարժումների պատմութեանը նուիրուած իր գրքերի գիտական կարեւորութիւնը՝ կեանքի վերջին տարիներին, հաւանաբար, կպուած նաեւ դարաբաղեան շարժման ծաւալման հետ, Ա. Յովհաննիսեանը նպատակայարմար գտաւ դրանք վերահրատա-

11 Տե՛ս ՀՀ Ազգային արխիւ, ֆ. 1169, ց. 1, գ. 250, թ. 9-9 շրջ.:
 12 Տե՛ս ՀՀ Ազգային արխիւ, ֆ. 1169, ց. 1, գ. 261, թ. 9-10:

13 А. Р. Иоаннисян, По поводу моей книги "Россия и армянское освободительное движение в 80-х годах XVIII столетия" - Տեղեկագիր. հասարակական գիտութիւններ, 1950, թիւ 4, էջ 83-88:

րակել¹⁴ դրանով իսկ, փաստօրէն, անվաւեր դարձնելով իր իսկ «ինքնաքննադատութիւնը», որին նա դիմել էր 1950-ական թուականներին ԽՍՀՄ-ում առկայ քաղաքական բիրտ մթնոլորտի թելադրանքով:

Եթէ Ա. Յովհաննիսեանի խորհրդային գործընկերների գերակշռող մասը բաւարարուած էր ԽՍՀՄ-ում գտնուող արխիւների ընձեռած հնարաւորութիւններով, ինչը եւ պայմանաւորել է խորհրդային պատմագրութեան առանձնայատկութիւններից մէկը, ապա, ի տարբերութիւն նրանց, նա 1960-ական թուականներից ի վեր հնարաւորութիւն է ունեցել պարբերաբար աշխատելու Ֆրանսիական արխիւներում եւ դրադարաններում: Գործունէութեան այս երկրորդ փուլում է ամբողջ խորութեամբ դրսեւորուել Ա. Յովհաննիսեանի պատմագիտական վառ տաղանդը: 1960-80-ական թուականներին նա գրել է XVIII դարի վերջի եւ XIX դարի առաջին կէսի Ֆրանսիական ուտոպիական կոմունիզմի պատմութեանը նուիրուած մեծարժէք աշխատութիւնների մի ամբողջ շարք (հինգ մենագրութիւն):

Գիտական գործունէութեան այս ժամանակահատուածում եւս Ա. Յովհաննիսեանը շարունակում էր իր ուշադրութեան կենտրոնում պահել այն ուտոպիստ կոմունիստներին, որոնց հայեացքների ուսումնասիրութեանն էին նուիրուած նրա առաջին աշխատութիւնները եւ, օգտագործելով Ֆրանսիական արխիւներում ու գրադարաններում յայտնաբերած նորայայտ փաստաթղթերը, պարբերաբար անդրադառնում էր նրանց գործունէութեան եւ հայեացքների բարեշրջման անտեսուած

կողմերին¹⁵: Այդուհանդերձ, կոմունիստական գաղափարախօսութեան պատմութեան ուսումնասիրութեան ասպարէզում նրա հիմնական ներդրումը յանգում էր միանգամայն նոր դէմքերի եւ ըստ այդմ՝ Ֆրանսիայում ուտոպիական գաղափարախօսութեան առանձնայատկութիւնների բացայայտմանը եւ տարածման ուղիների յստակեցմանը¹⁶: Ֆրանսիական կենտրոնական եւ դեպարտամենտական տարբեր արխիւների եւ մամուլի նիւթերի բծախնդիր ուսումնասիրութեան հիման վրայ նա պատմաբանների սեփականութիւնն է դարձրել նրանց անյայտ XVIII-XIX դարերում Ֆրանսիայում ուտոպիական կոմունիստական գաղափարախօսութեան մեծ թուով հետեւորդների (Գ. Բորիէ, Ժ.-Կ. Շապլիւի, Մ. Կիւբեր, Ժ. Գրենիւ, Ռ.-Ֆ. Դերոն եւ այլք), որոնց անունները մատնուած են եղել կա՛մ կատարելա մոռացութեան, կա՛մ յայտնի են եղել միայն թէականօրէն: Այս առումով առաւել ցցուն օրինակը XVIII դարի Ֆրանսիական յեղափոխութեան ժամանակաշրջանում կոմունիստական մտքի զարգացման պատմութեանը նուիրուած նրա մենագրութիւնն է, որում ընթերցողի առջեւ յառնում է մինչ այդ անյայտ գործիչների մի ամբողջ համաստեղութիւն: Ֆրանսիական հասարակական մտքի պատմութեան խոշորագոյն մասնագէտներից մէկի՝ Վ. Դալինի համոզմամբ, Ա. Յովհաննիսեանի գիրքը գիտերի եւ յայտնագործութիւնների մի ամբողջ շրջալ է¹⁷:

Ձեռնպահ մնալով Ա. Յովհաննիսեանի՝ հասարակական մտքի պատմութեանն առնչուող պատկառելի գիտական ժառանգութեան քննական վերլուծութեան մէջ

15 А. Р. Иоаннисян, Шарль Фурье, М., 1958; Առյճի՝ Коммунистические идеи в годы Великой французской революции, ст. 178-248.
 16 Տե՛ս մանրամասն В. А. Дунаевский, Г. С. Кучеренко, Աշ. աշխ., էջ 122-127:
 17 В. М. Далин, Историка Франции XIX-XX веков, ст. 159.

խորամուկ լինելուց՝ բաւարարուենք ընդհանուր բնոյթի ամենաէական դիտարկումներով: Մասնաւորապէս՝ այս թեմայի պատմագրութեան մէջ նա առաջինն է բացայայտել կոմունիստական գաղափարախօսութեան յարատեւութիւնը Յրանսիայում նապոլէոնեան ամբողջատիրական վարչակարգի օրօք եւ Երկրորդ Ռեստաւրացիայի տարիներին¹⁸: Իսկ աւելի ուշ, պատմագիտութեան մէջ կիրառելով միանգամայն նոր մօտեցում՝ նա նաեւ առաջինն է XIX դարի 40-ական թուականների ուտոպիական կոմունիստական գաղափարների զարգացումը շարժակալել յեղափոխական բանտարանական շարժումների պատմութեանը¹⁹: Դրանում է նրա վերջին աշխատութիւնների իւրապատկութիւնը:

Ա. Յովհաննիսեանը բազմիցս անդրադարձել է պատմաբանի համար խրթին՝ կենսագրական ժանրին: Նրա աշխատութիւնների կենտրոնում մշտապէս գտնուում էին մարդիկ, ընդ որում ոչ միայն պատմութեան առէջքներում խոր հետք թողած նշանաւոր գործիչներ, ինչպիսիք էին՝ Յ. Էմիլը կամ Շ. Ֆոլրիէն, այլեւ ճակատագրի դժխեմ հեզնանքով պատմութեան թատերաբեմից հեռու նետուած ուտոպիական գաղափարախօսութեան մեծաթիւ՝ մինչ այդ անյայտ հետեւորդներ, որոնք, սակայն, նրա տքնաջան գիտական պրպտումների արդիւնքում դարձել են պատմագիտական հանրութեան սեփականութիւնը: Այս հանգամանքն, ի դէպ, Ա. Յովհաննիսեանին զանազանում է միեւնոյն ժանրին բազմիցս անդրադարձած նրա խորհրդային

գործընկերներից՝ պատմական գործիչների դիմագծի ուրուագծման մեծ վարպետներից (Ա. Մանֆրեդ, Սերգէյ Ուտչենկո, Վլադիմիր Տրուխանովսկի եւ այլք), որոնց դրչին պատկանում են բացառապէս նշանաւոր պետական, քաղաքական եւ ռազմական գործիչների մեծարժէք կենսագրականներ: Միաժամանակ, հարկ է չանտեսել, որ այս ասպարէզում Ա. Յովհաննիսեանի եւ նրա գործընկերների միջեւ նկատելի է եւս մէկ զանազանութիւն: Այն է՝ նրա ուսումնասիրութիւնների յետնախորքի վրայ յառնում են տարբեր պատմական ժամանակաշրջաններում եւ տարածաշրջաններում, միաժամանակ նաեւ միմեանց հետ առնչութիւն չունեցող ասպարէզներում, ինչպիսիք են՝ XVIII դ. հայկական ազատագրական շարժումները, XIX դ. 40-ական թուականներին Յրանսիայում ծայր առած յեղափոխական պայքարը, տեսական մտորումները, իրենց գործունէութիւնը ծաւալած գործիչներ, որոնց, այդուհանդերձ, միաւորող միակ հանգամանքը եղել է պատմաբանի մեծ վարպետութիւնը:

Ինչպէս եւ իր սերնդակիցների, անկախ քաղաքացիութիւնից եւ ազգային պատկանելիութիւնից, գերակշռող մասը, Ա. Յովհաննիսեանը պրոֆեսիոնալ պատմաբան էր, որը, չնայած միջազգային լայն ճանաչմանը, իր՝ իբրեւ պատմաբանի մասին ունէր, այդուհանդերձ, համեստ կարծիք: XX դ. երկրորդ կէսին բարձր զարգացման մակարդակի հասած պատմական գիտութեան ասպարէզում պրոֆեսիոնալ պատմաբաններն ուժերը փորձարկել են կա՛մ միայն մէկ թեմայի շրջանակներում, կա՛մ առաւելագոյնը սահմանափակուել երկու տարբեր թեմաների ուսումնասիրութեամբ: 1920-ական թթ. խորհրդային պատմագիտական հնոցում թրծուած պատմաբանների մեծ մասը որդեգրել էր երկրորդ տարբերակը, ինչը, մեր կարծիքով, աւելի նախընտրելի է: Դա պայմանաւորուած էր խորհրդային պատմաբանների

18 А. Р. Иоаннисян, К истории французского утопического коммунизма первой половины XIX века, М., 1981.
 19 А. Р. Иоаннисян, Революционно-коммунистическое движение во Франции в 1840-1841 гг., Москва, 1983; նոյնի՝ Революционно-коммунистическое движение во Франции в 1842-1847 гг., Москва, 1986; նոյնի՝ Революция 1848 года во Франции и коммунизм, М., 1989.

առաջին սերնդի ներկայացուցիչների՝ կարմիր պրոֆեսուրայի ինստիտուտում ստացած չորսամեայ ուսումնառութեան առանձնայատկութիւններով, որի ընթացքում նրանք իւրաքանչիւր տարի մասնակցել են երկու տարբեր թեմաների նուիրուած սեմինարների աշխատանքներին՝ հանգամանք, որը եւ նախանշել է նրանց գիտական հետադայ հետազոտութիւնների ուղեծրերը²⁰: Ա. Յովհաննիսեանը եւս, ինչպէս իր սերնդակիցները, ժամանակի ոգուն համահունչ, ընտրել է երկու տարբեր պատմագիտական ոլորտներ՝ որեւէ ցանկութիւն իսկ երբեւէ չդրսեւորելով հատելու դրանց շրջանակները:

Նոյնիսկ այս պայմաններում, սակայն, նա, ինչպէս եւ բոլոր պրոֆեսիոնալ պատմաբանները, իր մասին արտայայտուում էր բացառապէս ծայրայեղ անհրաժեշտութեան դէպքում եւ խիստ զուսպ ձեւով: Այսպէս, պատմաբանը, որի անունը վաղուց ի վեր քաջ յայտնի էր միջազգային ասպարէզում, 1975 թ. դեկտեմբերին անձնական զրոյցում իր մասին յայտնեց հետեւեալ կարծիքը. «Իմ մասին ասում են, թէ ես Յրանսիական յեղափոխութեան պատմութեան մասնագէտ եմ: Դա այդպէս չէ, եթէ դուք ընթերցէք իմ գիրքը, Յրանսիական յեղափոխութեան պատմութեան մասին այնտեղ ոչինչ չէք գտնի: Ես միայն գաղափարների պատմութեան մասնագէտ եմ»: Տարիներ անց նեղ մասնագիտական շրջանակներում Յրանսիայի պատմութեան տարբեր մասնագէտներ նրա մասին յայտնում էին միեւնոյն կարծիքը՝ նրան ընկալելով միայն իբրեւ Ֆրանսիական հասարակական մտքի պատմութեան խոշորագոյն մասնագէտի: Նշենք, ի դէպ, որ տարբեր առիթներով թէ՛ իրենց եւ թէ՛ իրենց

գործընկերների մասին համահունչ կարծիքներ են յայտնել Ա. Յովհաննիսեանի գործընկերներից շատերը, այդ թւում՝ համաշխարհային ճանաչում ունեցող պատմաբաններ, ինչպիսիք էին՝ Ալբեր Սոբուլը, Վ. Դալինը, Մ. Ներսիսեանը, Անատոլի Ադոն եւ այլք:

Ա. Յովհաննիսեանի դեռեւս առաջին աշխատութիւններն անսքող բացայայտում են նրա գիտական գործունէութեանը բնորոշ հիմնական առանձնայատկութիւններից մէկը, այն է՝ անկախ նոր մեթոդոլոգիական հիմունքներ կիրառելու հանգամանքից, նա ի սկզբանէ ձեռնամուխ է եղել պատմագիտական դեռեւս չհետազոտուած կամ խիստ նուազ հետազոտուած թեմաների ուսումնասիրութեանը: Այս հարցը, սակայն, կարիք ունի որոշ մեկնաբանութիւններ: Ա. Յովհաննիսեանը, անհրաժեշտութեան դէպքում իր տարբեր գրքերի առաջաբաններում բարեխղճօրէն մատնանշում էր այն սակաւաթիւ պատմաբանների անունները, որոնք մինչ այդ այս կամ այն չափով իրենց աւանդն էին ներդրել նրա կողմից ուսումնասիրուող թեմաների հետազոտութեան ասպարէզում: Այդուհանդերձ, նա համեստօրէն ձեռնպահ էր մնում նախորդների եւ իր աշխատութիւնների միջեւ առկայ էական տարբերութիւնները մանրամասնելուց՝ թողնելով այդ խնդրի մեկնաբանումն ընթերցողների հայեցողութեանը: Փոխարէնը, անհրաժեշտութեան դէպքում նա չէր վարանում մատնանշել իր նախորդ գրքերում տեղ գտած անճշտութիւնները²¹:

Մեր կողմից նշենք, որ եթէ Ա. Յովհաննիսեանի սակաւաթիւ նախորդներ երբեմն անդրադարձել էին նրա կողմից քննարկուող ուտոպիական կոմունիստական գաղափարների պատմութեան հիմնա-

20 St'u, op'isly, В. М. Далнн, С. С. Бантке — историк // Памяти С. С. Бантке. (Из истории революционного движения в Бессарабии), Кишинев, 1970, ст. 58-59:

21 St'u, op'isly, А. Р. Иоаннисян, Революционно-коммунистическое движение во Франции в 1840-1841 гг., ст. 10:

Հարցերի որոշ կողմերի, ապա իրենց առջեւ ծառայած խնդիրներին լուծում էին տուել բաւականին սահմանափակ կտրուածքով եւ ցածր մակարդակով, իսկ ինչն առաւել էական է, առանց արխիւային փաստաթղթերի ուսումնասիրութեան: Ըստ այդմ՝ Ֆրանսիական ուստափական գաղափարախօսութեան պատմութեան տարբեր հիմնախնդիրներին նուիրուած նրա ուսումնասիրութիւնները հարկ է անվարանօրէն համարել նորարարական:

Այս առնչութեամբ մանրամասնեմք մէկ այլ հանգամանք եւս. Ա. Յովհաննիսեանի սակաւաթիւ նախորդների թուում երբեմն եղել են նաեւ անուանի պատմաբաններ: Նրանց թուում յիշատակենք նապոլէոնագիտութեան մեծ երախտաւորներ Ալբեր Վանդալի եւ Էդուարդ Դրիոյի անունները, որոնցից երկրորդը մեծ աւանդուելի նապոլէոնեան կայսրութեան արեւելեան քաղաքականութեան ուսումնասիրութեան բնագաւառում²²: Այս ասպարէզում, սակայն, Ա. Յովհաննիսեանի ցուցաբերած մօտեցումն, այդուհանդերձ, ինքնատիպ էր, քանզի յայտնի իրադարձութիւններին տուած նրա գնահատականները տրամագծօրէն զանազանում էին Ֆրանսիացի պատմաբանների (Ա. Վանդալ եւ այլք) մեկնաբանութիւններից, օրինակ, նապոլէոնեան զիւանագիտութեան հակառակական քաղաքականութեան դիմագծի անսքօղ բացայայտման հարցում թէ՛ մինչեւ 1807 թ. Տիլզիտի հաշտութեան կայացումը եւ թէ՛ մասնաւորապէս զրանից յետոյ²³: Բացի զրանից, զիտական շրջանա-

ռութեան մէջ դնելով արտասահմանեան պատմաբանների, այդ թուում՝ իր նշանաւոր նախորդի՝ Է. Դրիոյի համար անմատչելի մեծ թուով հայերէն եւ ռուսերէն սկզբնաղբիւրներ՝ նա յայտարարում մեծապէս նպաստել է միջազգային յարաբերութիւնների պատմութեան շուրջ շատ աւելի ամբողջական պատկերացումների ձեւաւորմանը: Արդիւնքում՝ նա մեկնաբանել է ոչ միայն Արեւելքում գերիշխող ազդեցութեան հաստատման նպատակ հետապնդող Անգլիայի եւ նապոլէոնեան Ֆրանսիայի անզիջում պայքարը, այլեւ, փաստօրէն, առաջինն է գիտականօրէն հիմնաւորել եւրոպական գերտէրութիւնների դեկաւար շրջանակների մեքենայութիւնները, որոնք միտուած էին Ռուսաստանին՝ Այսրկովկասի միացման խոչընդոտմանը:

Հարկ է մեկնաբանել, այդուհանդերձ, որ որոշ սկզբունքային հարցերում Ա. Յովհաննիսեանն, իբրեւ պատմաբան, զանազանում էր իր խորհրդային սերնդակիցներից: Խօսքը մասնաւորապէս վերաբերում է նրա գործընկերների գերակշռող մասի՝ ոչ մարքսիստ պատմաբանների առաջադրած մարքսիստական մեթոդոլոգիային անյարիր հայեցակարգային նոր մօտեցումների նկատմամբ անբարեացակամ տրամադրուածութեանը, ինչը պայմանաւորուած էր նրանց պատմագիտական դաստիարակութեամբ եւ բացայայտօրէն իրեն զգալ էր տալիս մինչեւ նրանց կեանքի վերջին օրերը: Ա. Յովհաննիսեանի զիրքորոշումն այս հարցում փոքր-ինչ այլ էր: ԽՍՀՄ-ում պատմական գիտութեան խիստ քաղաքականացուածութեան պայմաններում, ինչը ցայտունօրէն զրսեւորուել է նաեւ 1960-70-ական թուականներին, խորհրդային պատմաբանները, հիմնուելով մարքսիզմ-լենինիզմի դասականների տեսական դրոյթների վրայ, դատա-

22 E. Driault, *La politique orientale de Napoléon. Sébastiani et Gardane (1806-1808)*, Paris, 1904.
 23 Յատը, ուսերէնի շիմացութեան պատճառով նրա գրքին անտեղեակ արտասահմանեան պատմաբաններից ոմանք 1990-ական թուականներին եւս իրենց ֆրանսիացի նախորդների հետքերով այս հարցը քննարկել են, սուանց հաշտի անելու Ա. Յովհաննիսեանի իրատեսական

մեկնաբանութիւնները: Տե՛ս, օրինակ, I. Amini, *Napoléon et la Perse*, Paris, 1995:

փետել են եւ կտրականապէս մերժել ոչ միայն արտասահմանեան պատմաբանների՝ մարքսիզմին անյարիր, այլեւ նոյնիսկ 1960-ական թուականներին սակաւաթիւ խորհրդային պատմաբանների, մարքսիստական մեթոդոլոգիայի շրջանակում, Ֆրանսիական յեղափոխութեան պատմութեան մասնաւոր հարցերի շուրջ առաջադրած, սակայն խորհրդային պատմագրութեան ասպարէզում ինքնահաստատու գտած տեսակէտներից շեղուող մեկնաբանութիւնները: Ա. Յովհաննիսեանը, սակայն, նման բանավէճերի երբեւէ չի մասնակցել: 1970 թ. ԽՍՀՄ ԳԱ Համընդհանուր պատմութեան ինստիտուտի դեկաւարութիւնը միջազգային պատմագիտական թատերաբեմում վաղուց ի վեր մեծ հեղինակութիւն վայելող պատմաբանին պաշտօնապէս հրաւիրել է մասնակցելու եակօբինեան դիկտատուրայի դասակարգային էութեանն առնչուող խնդիրներին նուիրուած քննարկումին²⁴: Գիտակցելով, սակայն, առաջիկայ բանավէճի գերբաղաբականացումը բնոյթը²⁵ նա, ամենայն հաւանականութեամբ, այդ իսկ պատճառով է խուսափել զրան մասնակցելուց:

Տողերիս հեղինակն այս մասին կարող է դատել՝ նաեւ ելնելով Ա. Յովհաննիսեանի հետ ունեցած անձնական շփումներից:

24 Նրա արխիւում պահպանուել է ԽՍՀՄ ԳԱ Համընդհանուր պատմութեան ինստիտուտի՝ 1970 թ. ապրիլի 21-ի թուակիր պաշտօնական հրատերը. ՀՀ Ազգային արխիւ, ֆ. 1169, ց. 1, գ. 257, թ. 30:

25 Проблемы якобинской диктатуры. Симпозиум в секторе истории Франции Института всеобщей истории АН СССР 20-21 мая 1970 г., "Французский ежегодник", 1970, М., 1972, ст. 272-313. Այդ մասին մանրամասն տե՛ս С. Е. Летчфорд, В. Г. Ревуненков против «московской школы»: дискуссия о якобинской диктатуре, "Французский ежегодник", 2002, М., 2002, ст. 207-222; А. В. Чуднов, Размышления о скрытых смыслах дискуссии по проблемам якобинской диктатуры (60-е-80-е годы XX в.), "Французский ежегодник", 2007, М., 2007, ст. 256-265.

Մի առիթով նա անդրադարձաւ XVIII դարի Ֆրանսիական յեղափոխութեան պատմութեան խոչորագոյն պատմաբաններից մէկի՝ Ժակ Գոդշոյի (Ֆրանսիա)՝ 1950-ական թուականներին առաջադրած ատլանտեան յեղափոխութեան տեսութեանը, որը միտուած էր 1949 թ. ձեւաւորուած Հիւսիսատլանտեան դաշինքի հիմնաւորմանը: Ըստ այս տեսութեան՝ Ֆրանսիական յեղափոխութիւնը հարկ է ընդգրկել XVIII դարի երկրորդ կէսին եւ XIX դարի սկզբին ամբերկեան եւ եւրոպական մայրցամաքներում բռնկուած բուրժուական յեղափոխութիւնների ընդհանուր շղթայում եւ այն դիտել իբրեւ դրա բաղկացուցիչ մաս: Արեւմտեան բուրժուական յեղափոխութիւնների պատմութեան մարքսիստական ընկալումից եւ մեկնաբանումից ամբողջութեամբ շեղուող այս տեսութեան նկատմամբ, որն, ի դէպ, արժանացել էր Ա. Յովհաննիսեանի գործընկերներից շատերի՝ խորհրդային եւ արտասահմանեան մարքսիստ պատմաբանների (Ա. Մանֆրեդ, Ա. Սոբուլ եւ այլք) անողոք քննադատութեանը, նա ցուցաբերում էր շատ աւելի հանդուրժողական վերաբերմունք: Այս առիթով, նա մեղմ ձայնով յայտնեց իր չափաւոր եւ, ըստ իս, շատ աւելի ընդունելի կարծիքը. «Եթէ Գոդշոն այդ տեսութիւնն ատլանտեան չանուանէր, այն իր շուրջ նման աղմուկ չէր վեր հանի»:

Ա. Յովհաննիսեանին բնորոշ առանձնայատկութիւններից էր ստեղծագործական ուժերի կենտրոնացումը գլխաւորապէս մենագրութիւնների վրայ: Քաջ գիտակցելով, որ ապրելու են գրքերը եւ ոչ թէ յօդուածները՝ մի առիթով նա պարզօրոշ յայտնեց իր կարծիքը. «Ես յօդուածներ գրել չեմ սիրում»: Այստեղ, անկասկած, նշանակութիւն ունէր նաեւ այն հանգամանքը, որ նա, ինչպէս եւ իւրաքանչիւր խորհրդային պատմաբան, միանգամայն իրաւամբ զժգոհում էր ԽՍՀՄ-ում հրատարակուող պատմագիտական պարբերական-

ները (ի տարբերություն Ֆրանսիական պարբերականների) խմբագրությունների կողմից յաճախ արող անպատեհ շտկումներից կամ անհարկի կրճատումներից, որոնք, ըստ էության, կատարվում էին, առանց հեղինակի կարծիքը հաշուի առնելու: Ամեն դեպքում, անխտելի է նաև այն, որ նա հակուած էր ուժերի ցրմանը: Յիշում եմ, թէ ինչպէս 1982 թ. նա դիւանագիտորէն մերժեց Ֆրանսիական տարեգրքի ղեկավարութեան՝ իր Յեղափոխական-կոմունիստական շարժումը Ֆրանսիայում 1840-1841 թթ.: դեռևս ձեռագիր մենագրութեան գլուխներից մէկը յօդուածի ձեռով տպագրութեան ներկայացնելուն վերաբերող առաջարկը²⁶:

Ի տարբերութիւն խորհրդային եւ արտասահմանեան իր գործընկերներից շատերի (Ա. Մանֆրեդ, Վ. Դալին, Ժ. Գոդչո եւ այլք), Ա. Յովհաննիսեանը երբեւէ ցանկութիւն չի դրսեւորել անդրադառնալու իր նախորդների գիտական ժառանգութեան քննական վերլուծութեանը: Գրեթէ միեւնոյն վերաբերմունքն էր նա ցուցաբերում իր ժամանակակից պատմաբանների աշխատութիւնների նկատմամբ՝ ձեռնպահ մնալով նոյնիսկ գրախօսականների միջոցով պատմագիտական մտքի նորագոյն նուաճումների արժեւորումից: Ա. Յովհաննիսեանը գիտական երկարամեայ գործունէութեան ընթացքում գրախօսել է սոսկ մի քանի գիտական հրատարակութիւններ: Համեմատութեան կարգով նշենք, որ նրա սերնդակից Ժ. Գոդչոյի գրչին պատկանում է աւելի քան հազար գրախօսութիւն:

Եթէ Ա. Յովհաննիսեանի գործընկերներից ոմանց (Ա. Մանֆրեդ, Վ. Դալին, Վ. Տրուխանովսկի, Սերգեյ Տիխունսկի, Գրի-

գորի Սեւոստեանով, Մ. Ներսիսեան) գիտական գործունէութեան մէջ պատկառելի տեղ էր զբաղեցնում խմբագրական աշխատանքը, ապա նոյնը չի կարելի ասել նրա մասին: Նա խմբագրել է մի քանի գիրք²⁷, ընդգրկուել սակաւաթիւ պատմագիտական հրատարակութիւնների խմբագրական յանձնախմբերի կազմում²⁸, այդ թւում՝ գլխավորել Գրական յուշարձաններ մատենաշարի խմբագրական յանձնախումբը: Ըստ Մ. Ներսիսեանի վկայութեան՝ Ա. Յովհաննիսեանը պարբերաբար մերժել է նաև Պատմա-քանաչափական հանդէսի խմբագրական յանձնախումբում ընդգրկուելու իր առաջարկը:

Փոխարէնը, Ա. Յովհաննիսեանը չի զլացել զբաղուելու մանկավարժական եւ վարչական աշխատանքներով: 1931-1960 թթ. նա դասաւանդել է Երեւանի պետական համալսարանում, 1938-1960 թթ.՝ եղել նոր դարի պատմութեան ամբիոնի վարիչ, իսկ 1938-1947 թթ.՝ պրոֆեսոր: Լինելով գիտութեան մեծ կազմակերպիչ՝ նա շուրջ չորս տասնամեակ ՀՀ ԳԱԱ հումանիտար գիտութիւնների բաժանմունքում զբաղեցրել է ղեկավար բարձր պաշտօններ՝ պատմութեան ինստիտուտի տնօրէնի (1947-1953), ակադեմիկոս-քարտուղարի (1949-1960), փոխնախագահի (1960-1963, 1967-1986) եւ այլն: Նրա անմիջական ջանքերի շնորհիւ սերտ կապեր հաստատուեցին Հայաստանի եւ Հունգարիայի գիտութիւններ:

27 Հայ ժողովրդի պատմութիւն, առաջին մաս, Եր., 1951. История армянского народа, Ер., 1951; Երեւանի խանութիւնը XVIII դարի վերջում (1780-1800), Եր., 1958

28 Всемирная история, том VI, М., 1959; В. П. Волгин, Очерки истории социалистических идей. С древности до конца XVIII в., М., 1975; Առյճի՝ Очерки истории социалистических идей. Первая половина XIX в., М., 1976; Առյճի՝ Развитие общественной мысли во Франции в XVIII веке, М., 1977; Առյճի՝ Французский утопический коммунизм, М., 1979; Առյճի՝ Статьи и выступления, М., 1979.

26 Նրա արխիւում պահպանուել են միութեանական տարբեր հեղինակաւոր պատմագիտական հրատարակութիւնների կողմից արուած՝ յօդուածներ գրելուն առնչուող բազմաթիւ առաջարկներ, որոնց նա դրականօրէն չի արձագանգել:

րի ակադեմիաների միջեւ, որի արդիւնքում երկու հաստատութիւնների պատմաբանների մասնակցութեամբ հրատարակուեց յօդուածների արժէքաւոր մի ժողովածոյ՝ նուիրուած հայ-հունգարական առնչութիւնների պատմութեանը²⁹:

Այդուհանդերձ, Ա. Յովհաննիսեանը հակուած էր թմբկահարելու իր յաջողութիւնները, թէեւ դրա համար ունէր լայն հնարաւորութիւններ: Իր ծննդեան 70-ամեակի առնչութեամբ, 1978 թ. մարտի 6-ի թուակիր նամակով նա դիմել է ՀԽՍՀ ԳԱ նախագահ ակադեմիկոս Վիկտոր Համբարձումեանին խնդրանքով՝ ձեռնպահ մնալու իր յրեւեանը նշելու հետ կապուած միջոցառումների կազմակերպումից. «Ես չեմ ցանկանում, որ իմ մասին մամուլում որեւէ յօդուածներ կամ նշումներ տպագրուեն: Մի խօսքով՝ ես, իրօք որ, ոչ միայն անկեղծօրէն չեմ ցանկանում, որ իմ եօթանասունամեակն այս կամ այն ձեռով նշուի, այլև նոյնիսկ յիշատակուի»³⁰: Ա. Յովհաննիսեանը, յիրաւի, չէր ողջունում իր յրեւեանների առիթով յօդուածների լոյս ընծայումը: Նրա ծննդեան 75-ամեակի կապակցութեամբ ՀԽՍՀ ԳԱ Լրաբեր հասարակական գիտութիւնների ամսագրում, առանց նրա գիտութեան, տպագրուած յօդուածի³¹ առնչութեամբ, ըստ դրա հեղինակներից մէկի՝ Վ. Դալինի վկայութեան, նա վերջինիս յայտնել է սոսկ իր դժգոհութիւնն ու վրդովմունքը:

Ինչ վերաբերում է Ա. Յովհաննիսեանի անհատականութեանը, ապա անհրաժեշտ ենք համարում ուշադրութիւնը հրաւիրել նրա բարձր ինտելեկտի վրայ: Բաւա-

րարուենք մէկ օրինակով: 1977 թ. մայիսին դեռևս Երեւանի պետական համալսարանի 5-րդ կուրսի ուսանող տողերիս հեղինակին զանգահարեց նրա՝ ԳԱ փոխնախագահի քարտուղարուհին եւ ասաց. «Աբգար Ռուբէնովիչը Ձեզնից ներողութիւն է խնդրում, նա Ձեզ այսօր ընդունել չի կարող»:

Ա. Յովհաննիսեանի ծառայութիւններն, անտարակոյս, գնահատուել են խորհրդային իշխանութեան կողմից: Ինչպէս նշեցինք, նա զբաղեցրել է բարձր ակադեմիական պաշտօններ, արժանացել նաև տարբեր շքանշանների ու մեդալների: Թերեւս այս պատճառներով շատերը Հայաստանում նրան դասում են գնահատուած պատմաբանների շարքում: Որոշակի չափով դա, յիրաւի, այդպէս է: Հարկ է, սակայն, նկատի ունենալ, որ Ա. Յովհաննիսեանն, այդուհանդերձ, հայրենական այն պատմաբաններից էր, որի գիտական գործունէութեան շառաւիղները հատում էին նեղ ազգային եւ հանրապետական շրջանակները: Ուստի մեզ իրաւասու ենք համարում այս հարցը քննարկել աւելի լայն յենքի վրայ:

Պատմաբանները ոչ միայն տարբեր գիտական հետաքրքրութիւններ ունեն, այլև յաճախ անյարիր մօտեցումներ առօրէական, այդ թւում՝ ակադեմիական խնդիրների նկատմամբ: Ըստ այդմ՝ ցանկանում ենք մանրամասնել պատմագիտական իրականութեանը բնորոշ ցաւոտ մի իրողութիւն: Խորհրդային անուանի պատմաբանների, որոնց թւում Ա. Յովհաննիսեանի գործընկերներից շատերի դիրքորոշումները ԽՍՀՄ ԳԱ ակադեմիկոս ընտրուելու հարցում եղել են անհամատեղելի: Նրանցից ոմանց (Վ. Դալին, Նիկոլայ Մուշանով, Եֆիմ Չերնեակ եւ այլք) այս հարցն ամենեւին չէր մտահոգում: Փոխարէնը, շատերը (Բ. Պորչնեւ, Ա. Մանֆրեդ, Ս. Ուտչենկո, Միխայիլ Բարգ եւ այլք), հա-

29 Հայ-հունգարական պատմական եւ մշակութային կապերի պատմութիւնից, Եր., 1983

30 ՀՀ Ազգային արխիւ, ֆ. 1169, ց. 1, գ. 249, թ. 1

31 В. Далин, В. Микаелян, Выдающийся историк и крупный организатор науки, "Вестник общественных наук" АН Армянской ССР, 1983, N 6, ст. 99-103.

շուրի առնելով իրենց մեծ աւանդը պատմագիտութեան զարգացման այս կամ այն բնագաւառում, ցանկութիւն են դրսեւորել ընտրուելու ԽՍՀՄ ԳԱ անդամ:

Ա. Յովհաննիսեանը, ունենալով դրա համար պատմագիտական բոլոր իրաւասութիւնները, վերջինների թւում էր: Ճակատագրի քմահաճ հեգնանքով, սակայն, նրա, ինչպէս նաեւ նրա գործընկերներից շատերի, որոնց համբաւը վաղուց ի վեր դուրս էր եկել ԽՍՀՄ սահմաններից, իսկ վաստակը՝ յաւուր պատշաճի արժեւորուել տարբեր երկրներում՝ ԽՍՀՄ ԳԱ ակադեմիկոսների թւում ընդգրկուելու մտադրութիւնը մնաց սոսկ ցանկութիւնների հարթութեան վրայ: Խորհրդային ակադեմիայի ակադեմիկոսների գերակշռող մասը գիտութեան հետ հեռուոր առնչութիւն չունեցող պատճառներով յամառօրէն եւ հետեւողականօրէն ընդգրկմանում էր նրանց ընտրութեանը:

1964-1984 թթ. Ա. Յովհաննիսեանը բազմիցս մասնակցել է ԽՍՀՄ ԳԱ ընտրութիւններին, յաւակնել թէ՛ ակադեմիայի թղթակից-անդամի եւ թէ՛ ակադեմիկոսի տեղերին, սակայն մրցապայքարից միշտ դուրս է մնացել ընտրութիւնների առաջին իսկ փուլից յետոյ: Նրա՝ միմեանց յաջորդած անյաջողութիւնների պարագայում կային, մեզ յայտնի, երկու անբարենպաստ պատճառներ: Լինելով խիստ զուսպ անձնաւորութիւն՝ նա երբեւէ ի դերեւ չէր բերում իր յոյգերը, առաւել եւս նման նուրբ հարցերի կապակցութեամբ: Մի առիթով, սակայն, 1990 թ., որքան դա տարօրինակ էր եւ անհաւանական, Ա. Յովհաննիսեանն, այդուհանդերձ, տողերիս հեղինակին մատուցեց անակնկալ՝ հարեւանցիօրէն ակնարկելով իր ազգային պատկանելիութեան՝ իբրեւ ԽՍՀՄ ԳԱ ակադեմիկոս ընտրուելուն խոչընդոտող հանգամանքի փաստը: Զրոյցի ընթացքում նա յղեց ԽՍՀՄ ԳԱ Համընդհանուր պատմութեան

ինստիտուտի տնօրէն Ալեքսանդր Չուբարեանի օրինակը. «Կայ չգրուած մի օրէնք՝ բոլորը պէտք է ուսու լինեն: Տեսն՞ում էք, թէ Չուբարեանը որքան գրքեր ունի եւ լաւ գրքեր, բայց նրան եւս չեն ընտրում ակադեմիայի անդամ» (վերջինս, այնուամենայնիւ, մեծ ուշացումով ընտրուեց ՌԴ ԳԱ անդամ): Ա. Յովհաննիսեանին լաւ ճանաչող անձանց համար դժուար չի լինի, անշուշտ, կուհելը, թէ ինչ չափերի էր հասնում նրա անձնական վիրաւորանքը, ինչը թաքցնելն արդէն անզօր էր նոյնիսկ նրա անսասան կամքի եւ մեծ հաւասարակշռութեան տէր անձնաւորութիւնը: Տասնհինգ տարի տեւած գիտական մեր շփումների ընթացքում սա միակ դէպքն էր, երբ նա քօղարկուած ձեւով յայտնեց իր դժգոհութիւնն այն կացութեան առնչութեամբ, որում գտնուում էր:

Ինչ վերաբերում է երկրորդ հիմնական պատճառին, ապա այն 1981 թ. դեկտեմբերին տողերիս հեղինակի հետ ունեցած զրոյցի ընթացքում մեկնաբանեց ակադեմիկոս Բորիս Պիտորովսկին ԽՍՀՄ ԳԱ հերթական ընտրութիւններից անմիջապէս յետոյ: Խիստ վրդովուած ԽՍՀՄ ԳԱ ակադեմիկոսների գերակշռող մասի՝ Ա. Յովհաննիսեանի հանդէպ այս անգամ եւս ցուցաբերած բացայայտ կողմնակալ վերաբերմունքի առիթով, որը նրան մեծապէս յուզել էր՝ նա կսկիծով յայտնեց նրանց դիրքորոշման վրայ լոյս սփռող մի մանրամասն: Ըստ Բ. Պիտորովսկու խօսքերի՝ քուէարկութիւնից առաջ տեղի ունեցած մտքերի փոխանակութեան ընթացքում ակադեմիկոսներից ոմանք Ա. Յովհաննիսեանի ընտրութեան առնչութեամբ բացայայտօրէն յայտնել էին իրենց ժխտողական վերաբերմունքը՝ այն պատճառաբանելով վերջինիս բնակութեան վայրով. «Իսկ ինչն՞ով է նա մեզ օժանդակելու մեր աշխատանքներում»: Անկողմնակալ լինելու համար հարկ ենք համարում, այդուհանդերձ, նկատել, որ բացի Բ.

Պիտորովսկուց, ԽՍՀՄ ԳԱ տարբեր ընտրութիւնների ժամանակ նրան պարբերաբար սատարել են նաեւ այլ ակադեմիկոսներ, մասնաւորապէս՝ Միլիցա Նեչկինան եւ Ս. Տիխունսկին, որոնց ջանքերը, սակայն, շօշափելի արդիւնքի չեն յանգեցրել:

Ինչպէս տեսնում ենք, Ա. Յովհաննիսեանի՝ ԽՍՀՄ ԳԱ ակադեմիկոս ընտրութեան հանգամանքը հեռուոր իսկ առնչութիւն չի ունեցել նրա գիտական անուրանալի վաստակի թերագնահատման հետ, քանզի նման հարց երբեւէ նոյնիսկ չի քննարկուել: Ուստի մենք հակուած ենք հաւաստելու, որ նրա բեղմնաւոր գիտական գործունէութիւնը, ինչպէս նաեւ խորհրդային ու համաշխարհային պատմագրութեան ասպարէզում ներդրած մեծ աւանդը խորհրդային ակադեմիան ըստ արժանւոյն չի գնահատել:

Պատմագիտական իրականութեանը խիստ բնորոշ է եւս մէկ դառն օրինաչափութիւն. մեծ պատմաբանների գերակշռող մասի ժամանակակիցներից շատերը նրանց կենդանութեան օրօք նոյնիսկ չեն գիտակցել, թէ գիտութեան ինչպիսի տաղանդաւոր մշակների հետ է իրենց վիճակուած եղել համագործակցելու: Իրենց նախորդներին նուիրուած թէ՛ բանաւոր եւ թէ՛ գրաւոր ելոյթներում այս ցաւալի փաստը հաւաստել են շատերը³²: Այս առումով, սակայն, Ա. Յովհաննիսեանը, մեր կարծիքով, եզակի յաջողակ պատմաբաններից էր եւ ճակատագրից դժգոհելու ոչ չինչ չունէր, քանզի նրա կենդանութեան օրօք կարծիքը նրա՝ իբրեւ մեծ պատմաբանի մասին միանշանակ էր: Անկախ սերունդների տարբերութեան հանգամանքից, Արեւմտեան Եւրոպայի պատմութեան ուսումնասիրողների համար նա անառարկելի եւ անվերապահ հեղինակութիւն էր:

1991 թ. դեկտեմբերին վրայ հասած նրա վախճանից յետոյ անցել են երկար տարիներ: Այսօր արդէն կենդանի չեն նրա սերնդակիցները՝ թէ՛ բարեկամները, թէ՛ գործընկերները եւ թէ՛ հակառակորդները: Ժամանակակիցներից ոմանց մօտ նրա հանդէպ արմատացած անձնաւորուած, կողմնակալ վերաբերմունքը եւս մնացել է անցեալի գրկում: Պատմաբանի համար ամենաանողոք եւ միաժամանակ միակ անկողմնակալ դատաւորը ժամանակի քննութիւնն է, որին դիմակայում են սոսկ նրա գրչին պատկանող մնայուն գիտական ուսումնասիրութիւնները: Ա. Յովհաննիսեանի մենագրութիւնները, որոնց վրայ չի տարածուած վաղեմութեան օրէնքը, նրա մտերիմ գործընկերներից Ա. Մանֆրեդի եւ Վ. Դալինի՝ միեւնոյն ժամանակաշրջանի Յրանսիայի պատմութեանը նուիրուած մեծարժէք գրքերի հետ մէկտեղ շարունակում են ապրել: Նրա գրքերը, որոնց վիճակուած է երկար կեանք, յղում են թէ՛ Յրանսիայի եւ թէ՛ հայ ժողովրդի պատմութեան մասնագէտները, այդ թւում՝ նրա հետ երբեւէ անձնական շփումներ չունեցած պատմաբանների երիտասարդ սերնդի ներկայացուցիչները՝ դրանով իսկ անմար պահելով ականաւոր պատմաբանի յիշատակը պատմական գիտութեան տատասկոտ քառուղիներում:

Արգար Յովհաննիսեանի՝ իբրեւ պատմաբանի համառօտ, սակայն, ընդգրկուն գնահատականը դեռեւս 1975 թ. յուլիսին էրմիտաժի իր աշխատասենեակում անձնական զրոյցի ընթացքում տուեց ակադեմիկոս Պիտորովսկին. «Արգար Ռուբէնովիչը խորհրդային ակադեմիայի զարդն է»: Նրա անունն, անտարակոյս, իբրեւ այդպիսին, կը դրոշմուի պատմաբանների գալիք սերունդների կողեկտիւ մտածողութեան մէջ:

32 St' u, օրինակ, М. А. Барг, Владимир Михайлович Лавровский, // Портреты историков. Время и судьбы, том 2. Всеобщая история, ст. 227: